

四庫全書薈要

• 乾隆御覽本

經部

欽定四庫全書薈要

經部

禮記注疏卷十一



禮記注疏卷十一

漢鄭氏注 唐陸德明音義 孔穎達疏

制

王者之制祿爵公侯伯子男凡五等諸侯之上大夫卿

下大夫上士中士下士凡五等注二五象五行剛柔十

日祿所受食爵秩次也上大夫曰卿音義王者如字徐于況反十日

入一疏正義曰此一經論爲王者之制祿爵公侯卿大夫以下及士之法凡王者之制度祿爵爲重其

食祿受爵之人有公侯伯子男並南面之君凡五等也其諸侯之下北面之臣有上大夫卿有下大夫有上士有中士有下士凡五等也南面之君五者法五行之剛日北面之臣五者法五行之柔日不以王朝之臣而以諸侯臣者王朝之臣本是事王今王制統天下故不目在其數謂制統天下之君及天下之臣取君臣自相對故不取王臣也此作記者雖記虞氏皇而祭之文大都總記三王制度故言王者之制不云帝皇制也不云天子制者白虎通云王是天子爵號穀梁傳曰王者仁義歸徃曰王以其身有仁義衆所歸徃謂之王王者制統海內故云王制不云天子制也凡王者不得稱官故學記云大德不官而得稱職故詩云衮職有闕考工記云國有六職坐而論道謂之王公是也此並互文以見義既天子不官亦當不主一職若以主天下爲職亦得管天下爲官矣祿者穀也故鄭注司祿云祿之言穀年穀豐乃後制祿援神契云祿者錄也白虎通云祿者錄也

上以收錄接下以名錄謹以事上是也爵者盡也熊氏以爵盡其才而用之故白虎通云爵者盡也所以盡人才是也案下文云位定然後祿之又大司徒云十有一曰以賢制爵十有二曰以庸制祿並祿在爵後此祿在爵前者祿是田財之物班布在下最是國之重事須裁節得所王者制度重之故在於先故此經下文先云天子之田乃云諸侯之田次云制農田又云下士視上農夫祿又云君十卿祿並先言祿下始云次國上卿當大國中卿是從云爵也熊氏皇氏以爲試功之祿故在爵前案此王者制度必當舉其正禮何得唯明試功之祿下云君十卿祿豈試功乎熊氏皇氏之說於義疑也公者案元命包云公者爲言平也公平正直侯者侯也侯王順逆伯者伯之爲言白也明白於德也子者奉恩宣德男者任功立業此五等者謂虞夏及周制殷則三等公侯伯也此公侯伯子男獨以侯爲名而稱諸侯者舉中而言又爾雅侯爲君故以侯言之伯亦居中不言

諸伯者嫌是東西二伯及九州之伯故也上大夫卿者見下文云下大夫倍上士卿四大夫祿是下大夫之上則有卿故知上大夫即卿也此上大夫卿外惟有下大夫所以下文除卿之外更有上大夫下大夫者謂就下大夫之中更分爲上下耳卿者白虎通云卿之言嚮也爲人所歸嚮大夫者達人謂扶達於人士者事也皇氏熊氏皆爲任職事其大夫之稱亦得兼三公故詩云三事大夫謂三公也上大夫卿亦兼孤也故春秋陽處父爲太傅經云晉殺其大夫陽處父是也孤亦稱公故鄉飲酒禮云公三重是孤也卿亦得稱公故春秋襄三十年傳云鄭伯有之臣稱伯有曰吾公在壑谷士既命同而分爲三等者言士職卑德薄義取漸進故細分爲三卿與大夫德高位顯各有別命不復細分其諸侯以下及三公至士總而言之皆謂之官官者管也以管領爲名若指其所主則謂之職故周禮云設官分職通卿大夫士也知諸侯亦爲官者尚書周官云唐虞稽古建官

惟百下云外有州牧侯伯是州牧侯伯亦爲官也若細而
言之諸侯非偏有所主則非官也故學記云大德不
官注云天子諸侯是也諸侯亦稱職故左傳云小有述
職大有巡功述職謂諸侯朔天子是諸侯稱職也其爵
則殷以前大夫以上有爵故士冠禮云古者生無爵死
無諡謂士也周則士亦有爵故鄭注周制以士爲爵死
猶不爲諡耳是也注正義曰知象陰陽者案元命包云
周爵五等法五精注云五精是其總法五行分之則法
五剛甲丙戊庚壬其諸侯之
臣法五柔乙丁巳辛癸是也

天子之田方千里注象日月之大亦取晷同也此謂縣

內以祿公卿大夫元士音義

晷音軌
日影

公侯田方百里伯

七十里子男五十里不能五十里者不合於天子附於

諸侯曰附庸天子之三公之田視公侯天子之卿視伯
天子之大夫視子男天子之元士視附庸注皆象星辰
之大小也不合謂不朝會也小城曰附庸附庸者以國
事附於大國未能以其名通也視猶比也元善也善士
謂命士也此地殷所因夏爵三等之制也殷有鬼侯梅
伯春秋變周之文從殷之質合伯子男以爲一則殷爵
三等者公侯伯也異畿內謂之子周武王初定天下更
立五等之爵增以子男而猶因殷之地以九州之界尚

狹也周公攝政致太平斥大九州之界制禮成武王之
意封王者之後爲公及有功之諸侯大者地方五百里
其次侯四百里其次伯三百里其次子二百里其次男
百里所因殷之諸侯亦以功黜陟之其不合者皆益之
地爲百里焉是以周世有爵尊而國小爵卑而國大者

唯天子畿內不增以祿羣臣不主爲治民音義

朝直遠反卷內

皆同畿求衣反狹音洽後文同太平音泰斥昌石反黜
陟上丑律反下竹力反主爲于偽反下爲有亦爲有同
疏正義曰此一節論天子畿內之田及畿外五等諸侯
及畿內公卿受地多少之法各隨文解之注正義曰

案元命包云日圓望之廣尺以應千里故云象日月之大亦取晷同也者案考靈耀云地與星辰四遊升降於三萬里之中夏至之景尺有五寸是半三萬里得萬五千里故鄭注司徒云凡日景於地千里而差一寸是千里同一寸也細而言之就千里之內亦漸漸分數不同此云同一寸者大略而言之非但象日月大小又取晷同故云亦云以祿公卿大夫元士者即下文三公之田視公侯天子之卿視伯以下是也案下注云待封王之子弟此唯言公卿大夫元士者舉正者言之耳皆象星辰之大小也者案元命包云王者封國上應列宿之位注云若角亢爲鄭房心爲宋之比又云其餘小國不中星辰者以爲附庸是象星辰大小也非但象星辰其百

里者又象雷故援神契云王者之後稱公大國稱侯皆千乘象雷震百里是取法於雷也其七十里者倍減於百里五十里者倍減於七十里故孝經云德不倍者不異其爵功不倍者不異其土故轉相半別優劣云不合

謂不朝會也者謂不得與諸侯集合朝會天子也云小城曰附庸者庸城也謂小國之城不能自通以其國事附於大國故曰附庸此不能五十里故爲小國之城若詩崇墉言言及易公用射隼于高墉之上是大國之城亦名庸也云元善也善士謂命士也者案易文言云元者善之長也故元爲善也案周禮注天子上士三命稱元士也天子之士所以稱元者異於諸侯之士也周禮公侯伯之士雖一命不得稱元士其夏殷以上諸侯之士皆不命也故下文云小國之卿與下大夫一命是士不得命也云此地殷所因夏爵三等之制也者以夏會諸侯於塗山執玉帛者萬國若不百里七十里五十里則不得爲萬國也故知夏爵三等之制如此經文不直舉夏時而云殷所因者若經指夏時則下當云萬國不得云凡九州千七百七十三國故以爲殷所因夏爵三等之制也其國則少於夏也云殷有鬼侯梅伯案明

堂位云脯鬼侯又呂氏春秋云昔紂爲無道殺梅伯而醢之殺鬼侯而脯之以禮諸侯於廟楚辭云梅伯菹醢是殷有鬼侯梅伯也鄭引此者證殷有侯有伯二王之後稱公則殷亦有公可知也云春秋變周之文從殷之質合伯子男以爲一者案公羊傳桓十一年九月鄭忽出奔衛忽何以名春秋伯子男一也辭無所貶何休云春秋改周之文從殷之質合伯子男爲一辭無所貶皆從子春秋之時伯亦得稱子子亦得稱伯今鄭是伯爵忽若稱子與成君無異則不見在喪之降貶故在喪降而稱名非爲貶責稱名故云辭無所貶何休之意合伯子男爲一皆從稱子也鄭康成此注之意合伯子男以爲一皆稱伯也與何休不同故鄭云殷爵三等者公侯伯也若殷家夷狄之君大者亦稱伯故書序云巢伯來朝注云伯爵也南方遠國云則殷爵三等者公侯伯也者則公百里侯七十里伯五十里也云異畿內謂之子者畿外既有公侯伯標異畿內特謂之子爵雖爲子

若作三公則受百里之地若作卿則受七十里之地若作大夫則受五十里之地殷家雖因於夏畿內之制與夏不同夏之畿內國皆方五十里故鄭注尚書萬國之數云四百國在畿內是皆五十里殷之畿內據下文有百里之國九十七里之國二十有一五十里之國六十有三凡九十三國是與夏不同也張逸問殷爵三等公侯伯尚書有微子箕子何鄭答云微子箕子實是畿內采地之爵非畿外治民之君故云子也云周武王初定天下更立五等之爵增以子男者案尚書武成云列爵惟五分土惟三既云列爵惟五故知增以子男也云而猶因殷之地以九州之界尚狹也者解所以列爵既五則應五等之土上公五百里以下猶因殷之地公侯百里伯七十里子男五十里爲三等以雖伐紂九州之地尚隘狹未得五等之封故也云周公攝政致太平斥大九州之界制禮成武王之意者斥大謂開斥廣大於先中國方三千里今方七千是斥大九州之界也武王既

列爵惟五是意欲爲五等之封但爲界狹今周公爲五等之封是成武王之意云諸侯大者地方五百里以下皆大司徒職文云所因殷之諸侯亦以功黜陟之者謂周之諸侯既以有功封建其國所因殷之諸侯既無大罪不可以絕滅亦如周之諸侯以勲多少黜退之升陟之殷之諸侯大者百里今日有功則升陟或二百里或三百里是陟之也云黜者謂於周家有過諸侯黨紂爲惡者皆黜退之不復得爲諸侯或黜減至七十五里或有罪黜爲附庸也云其不合者皆益之地爲百里焉謂其不以功過黜陟者謂平常諸侯皆益之地使滿百里焉云周世有爵尊而國小爵卑而國大者張逸疑而不解以問於鄭鄭答之云設今有五十里之國於此無功可進無過可退亦就益其地爲百里之國爵尊而國小者若虞虢之君爵於公地方百里爵卑而國大者侯亦二百里伯三百里子男二百里皆大於虞虢鄭通言男亦二百里者據男有功得附庸者言之耳大於虞虢百

里之意云惟天子畿內不增以祿羣臣不主爲治民者
解畿外之地公侯伯子男皆增其地今畿內公卿大夫
采地不增益之者本以祿賜羣臣不須增益其地以其
不主爲治民故也外土諸侯本爲治民須便民利國故
須增益其封周之畿內有百里之國有五十里之國有
二十五里之國鄭注小司徒云百里之國凡四都五十
里之國凡四縣二十五里之國凡四甸故崔氏云畿內
有百里之國有五十里之國有二十五里之國元命包
云周爵五等法五情春秋三等象三光說者因此以爲
文家爵五等質家爵三等若然夏家文應五等虞家質
應三等案虞書輯五瑞修五禮五玉豈復三等乎又禮
緯舍文嘉云殷爵三等殷正尚白白者兼正中故三等
夏尚黑亦從三等案孝經夏制而云公侯伯子
男是不爲三等也舍文嘉之文又不可用也

制農田百畝百畝之分上農夫食九人其次食八人其

次食七人其次食六人下農夫食五人庶人在官者其
祿以是爲差也注農夫皆受田於公田肥墾有五等收
入不同也庶人在官謂府史之屬官長所除不命於天

子國君者分或爲糞音義

分扶問反食音嗣下同徐音自差初佳反徐初宜反下注

同燒本又作墾苦交反長丁丈反下文及注皆同糞方遲反

諸侯之下士視上農夫

祿足以代其耕也中士倍下士上士倍中士下大夫倍
上士卿四大夫祿君十卿祿次國之卿三大夫祿君十
卿祿小國之卿倍大夫祿君十卿祿注此班祿尊卑之

差疏

正義曰此一節論制農田有上中下以祿庶人在官及士大夫井卿及君之祿各隨文解之注正義

曰農夫皆受田於公者以經云制農田是主者制度授農以田是農夫受田於公也云肥墾有五等收入不同也者案周禮地有九等故司徒上地家七人中地家六人下地家五人注云有夫有婦然後爲家自二人以至於十人爲九等一家男女七人以上則授之以上地所養者衆也男女五人以下則授之以下地所養者寡也止以七人六人五人爲率者舉中而言如鄭此言上地家七人者謂中地之上家六人者謂中地之中家五人者謂中地之下以此推之下地之上家四人下地之中家三人下地之下家二人則上地之上家十人上地之中家九人上地之下家八人是有九等從十人而以至於二人此經地惟五等自九人而下至五人不同者大司徒所云農夫授田實有九等此據制庶人在官之祿最下者猶五人故從上農夫至五人而已司徒上地家

十人此云上農夫食九人者謂上中之地亦爲上地即上農夫不言上上者欲取九人當下士祿亦與司徒不異也既有九等案大司徒不易之地家百畝一易之地家二百畝再易之地家三百畝地惟有三等者大司徒言其大綱其實不易一易再易各爲三等則九等也案異義左氏說山林之地九夫爲度九度而當一井藪澤之地九夫爲鳩八鳩而當一井京陵之地九夫爲辨七辨而當一井淳鹵之地九夫爲表六表而當一井疆潦之地九夫爲數五數而當一井偃豬之地九夫爲規四規而當一井原防之地九夫爲町三町而當一井隰臯之地九夫爲牧二牧而當一井衍沃之地九夫爲井賦法積四十五除山川坑岸三十六井定出賦者九井則千里之畿地方百萬井除山川坑岸三十六萬井定出賦者六十四萬井長穀萬乘如異義此說則方十里凡百井三十六井爲山川坑岸六十四井爲平地出稅案鄭注小司徒成方十里緣邊一里治爲溝洫則三十六井

其餘方八里爲甸六十四井出田稅與異義不同者異義所云通山林藪澤九等而言之鄭注小司徒者據衍沃平地而言之所以不同也異義九等者據大略國中有山林至衍沃之等言之周禮九等者據授民地肥瘠有九等與異義不同也尚書禹貢注云一井上上出九夫稅上中出八夫稅上下出七夫稅中上出六夫稅中中出五夫稅中下出四夫稅下上出三夫稅下中出二夫稅下下出一夫稅所以又有此九等者以禹貢九州有上中下九等出沒不同故以井田計之以一州當一井假令冀州上上出九百萬夫之稅兗州下下出一百萬夫之稅是九州大較相比如此非謂冀州之民皆出上上兗州之民皆出下下與周禮九等又不同也所以
上農夫得食九人者以史記云上地畝一鍾鐘六斛四斗百畝百鍾則六百四十斛案食貨志又云上孰其收自四斛則百畝四百斛也案廩人中歲人食三鬴其九人之內老幼相通不皆人食三鬴故食九人也其民之

常稅不過什一又庶民喪祭費用又少且年有豐儉不恒上執崔氏以爲畝皆一鍾人恒食四鬴又爲什二而稅又云祭用數之仞者苟欲計算使合其義非也云庶人在官謂府史之屬者則周禮大宰云府六人史十有二人云之屬謂工人賈人及胥徒也云官長所除不命於天子國君者官長謂冢宰爲天官之長司徒爲地官之長自所命或若大府爲府藏官之長大司樂爲樂官之長是也言所除者謂所命之官除去其舊名籍周禮注云凡府史以下官長所自辟除以其非九命之內故知不命於天子國君也若子男之士雖無命亦當命於國君也以其稱士故也此班祿尊卑之差者經云下士視上農夫祿足以代其耕也則庶人在官者雖食八人以下不得代耕故載師有官田謂庶人在官之田大夫以下位卑祿少故大小國不殊卿與君祿重位尊故祿隨國之大小爲節案周禮天子卿大夫士與諸侯之臣執贊同則祿亦同也此自下士至小國之卿倍大夫祿

皆據無采地者言之故鄭答林碩云王畿方千里者凡九百萬夫之地三分去一定受田者三百萬夫出都家之田以其餘地之稅祿無田者下士食九人中士食十八人上士三十六人下大夫七十二人中大夫百四十人卿二百八十八人

次國之上卿位當大國之中中當其下下當其上大夫小國之上卿位當大國之下卿中當其上大夫下當其下大夫注此諸侯使卿大夫類聘並會之序也其爵位

同小國在下爵異固在上耳音義

類吐弔反

疏

正義曰此一節論諸侯使

卿大夫士類聘班序行列之法各隨文解之注正義曰經文既稱大國小國大小並在則非是特來故知使卿

大夫類聘並會也云其爵位同小國在下者爵同謂同作卿也據經文小國卑於大國故知小國之卿在大國之卿下云爵異固在上耳者謂大國是大夫小國是卿則經云小國之卿位當大國之上大夫是小國之卿爵異於大國之大夫其爵既異固當在大夫之上必知爵異小國在上者以其卿執羔大夫執鴈使卿締冕大夫玄冕故知小國之卿不得在大國大夫之下也

其中有中士下士者數各居其上之三分注謂其爲介若特行而並會也居猶當也此據大國而言大國之士爲上次國之士爲中小國之士爲下士之數國皆二十七人各三分之上九中九下九以位相當則次國之上士

當大國之中中當其下小國之上士當大國之下凡非

命士亦無出會之事春秋傳謂士爲微音義

三分如字爲介音界

疏

正義曰中士者謂次國之士下士者謂小國之士大國之士既分爲三分次國小國之士亦分爲三分今

大國之士既定在朝會若其有中國之士小國之士者其行位之數各居其上國之三分之二謂次國以大國爲上而次國上九當大國中九次國中九當大國下九是當其大國之三分之二小國以次國爲上小國上九當次國中九小國中九當次國下九亦是居上三分之二也是各居上之三分注正義曰言謂其爲介者若聘禮士介四人是也各特行則隱元年及宋人盟於宿是也本國出使是行至他國與諸國並會也云此據大國而言者以經必云中士下士不云上士是文以大國爲主以中國下國來當之故知據大國而言云大國之士

爲上次國之士爲中小國之士爲下者解經之中士爲中國之士下士爲下國之士經雖無上士之文以中士下士類之則上士爲大國之士也號上士中士下士之內各分爲上九中九下九言大國之士爲上不解經之上字者自謂次國以大國爲上小國以次國爲上耳云凡非命士亦無出會之事者即祭法庶士是也云春秋傳謂士爲微者隱元年及宋人盟於宿公羊傳云執及之內之微者也是謂士爲微也

凡四海之內九州州方千里州建百里之國三十七十里之國六十五里之國百有二十凡二百一十國名山大澤不以封其餘以爲附庸閒田八州州二百一十國注建立也立大國三十十三公也立次國六十十六

卿也立小國百二十十二小卿也名山大澤不以封者
與民同財不得障管亦賦稅之而已此大界方三千里
三三而九方千里者九也其一爲縣內餘八各立一州
此殷制也周公制禮九州大界方七千里七七四十九
方千里者四十有九也其一爲畿內餘四十八州各
有方千里者六設法一州封地方五百里者不過四謂
之大國又封方四百里者不過六又封方三百里者不
過十一謂之次國又封方二百里者不過二十五及餘

方百里者謂之小國盈上四等之數并四十六一州二百一十國則餘方百里者百六十四也凡處地方千里者五方百里者五十九其餘方百里者四十一附庸地

也音義

聞音闕障之尚反

疏

正義曰此一節論四海之內九州別建國多少及附庸閒田之法

如鄭所注此經云是殷法也周禮則九服夷鎮蕃三服謂之四海四海之內謂要服以內殷則服數無文則必不與周同案爾雅釋地云九夷八狄七戎六蠻謂之四海孫炎云海之言晦晦闕於禮義此言四海之內謂夷狄之內也地方三千里以開方計之三三如九州則方者有九其一爲天子縣內下文具之以外八州州則方千里者有一州建百里之國三十是公國也七十里之國六十是侯國也五十里之國百有二十是伯國也是

一州凡二百一十國必二百一十國者案元命包云陽
成於三列於七三七十二一故二百一十國也其餘以
爲附庸閒田謂置二百一十國外之餘地爲附庸閒田
也若封人附於大國謂之附庸若未封人謂之閒田每
州二百一十國所餘之地者則下文云方百里者十方
十里者六十是也注正義曰建是樹立之義故建爲立
也云立大國三十三公也者鄭以天子縣內三公之
國亦百里今畿外大國亦百里是準擬畿內三公之地
故云十三公也每十箇國則準一公是三十國準於三
公也云立次國六十十六卿也者亦以畿內六卿之地
方七十里今畿外次國亦七十里故知準擬六卿言十
於六卿六十也通三孤則謂之九卿據有職事者言之
故爲六卿也云立小國百二十十二小卿也者小卿則
天子畿內大夫國方五十里今畿外小國亦五十里是
準擬大夫當十於十二小卿也定本云十十二小卿重
有十字俗本直云十二小卿俗本誤也云名山大澤不

以封者與民同財者若封諸侯則諸侯為主若不得取其財物故不封諸侯使民共取故山虞職云令萬民時新材有期日是也云不得障管亦賦稅之而已者既不封諸侯其諸侯不得障塞管領禁民取物民既取物隨其所取賦稅而已故澤虞云使其地之人守其財物以時入之于玉府是也定本云不得不管亦賦稅而已謂雖不封諸侯諸侯不得不管若如此解則於而已二字爲妨恐定本誤也云此殷制也者以夏時萬國則地餘三千里周又中國方七千里今大界三千非夏非周故云殷制也其實夏之末年亦與殷同方三千里故下云天子之縣內鄭注云縣內夏時天子所居州界名也又云夏末既衰夷狄內侵土地減國數少是也云周公制禮九州大界方七千里者案大行人邦畿方千里其外方五百里謂之侯服甸服男服采服衛服要服服五百里通王畿四面相距爲七千里大行人要服已外即云九州之外謂之蕃國是要服以內爲中國也云設法一

州封地方五百里者不過四者言設法謂假設爲法非實封也故職方云千里封公以方五百里則四公注云每事言則者設法也是不實封必知不實封者以每州有四公八州則三十二公周之上公則惟杞宋耳故知非實封也一州有千里之方六則一箇千里之方爲方百里者百一箇五百里之國爲方百里者二十五箇方二十五用千里之方一是方五百里者不過四也云又封方四百里者不過六者以一箇四百里之國爲方百里者一十六六箇一十六爲九十六是用百里之方九十六爲六箇四百里之國故云方四百里者不過六用千里之方一猶餘百里之方四云又封方三百里者不過十一者以一箇三百里之國爲方百里者九十一箇九爲九十九是用百里之方九十九故云封方三百里者不過十一用千里之方一猶餘百里之方一云又封方二百里者不過二十五者以一箇二百里之國爲方百里者四二十五箇二百里國用千里之方一故云封

方二百里者不過二十五云盈上四等之數者謂將此
百里小國一百六十四添盈公侯伯子四等之數四十
六則爲一州二百一十國也云則餘方百里者百六十
四也者以其上惟云餘方百里者謂之小國不顯其數
多少直言盈上四等之數四等既有四十六若添滿二
百一十必湏百六十四故云方百里者百六十四也云
凡處地方千里者五方百里者五十九者封公則四
是用千里之方一封侯則六又用千里之方一封伯十
又用千里之方一封子二十五又用千里之方一封男
百又用千里之方一是處地方千里者五男國更湏六
十四則應湏百里之方六十四但千里之方六封侯之
外猶餘百里之方四千里之方封伯十一之外猶餘百
里之方一是五箇千里之方內總餘百里之方五得爲
五箇男國則五箇千里之方更得五十九箇百里之方
是滿六十四也云其餘方百里者四十一附庸地也者
以百里之方百去其五十九故餘四十一也案鄭注大

司徒云侯附庸九同伯附庸七同子附庸五同男附庸三同今一州惟有方百里者四十一得備侯伯子男二百一十國附庸者鄭注司徒云凡諸侯爲牧正帥長及有德者乃有附庸非國國皆有且此云州別二百一十國及侯附庸九同皆設法而言非實事也注侯附庸九同者諸侯有功可進爲公爲四百里之上加九同得進爲五百里也伯於三百里之上加七同得爲四百里進爲侯也子於二百里之上加五同得爲三百里進爲伯也男於百里之上加三同得爲二百里進爲子也言同者謂積累衆附庸而滿同也非謂一附庸居一同也鄭注司徒云公無附庸以其尊極故也又鄭云魯以周公之故得兼四等加二十四附庸方七百里也

天子之縣內方百里之國九七十里之國二十有一五十里之國六十有三凡九十三國名山大澤不以盼其

餘以祿士以爲閒田注縣內瘠時天子所居州界名也
殷曰畿詩殷頌曰邦畿千里惟民所止周亦曰畿畿內
大國九者三公之田三爲有致仕者副之爲六也其餘
三待封王之子弟次國二十一者卿之田六亦爲有致
仕者副之爲十二又三爲三孤之田其餘六亦待封王
之子弟小國六十三大夫之田二十七亦爲有致仕者
副之爲五十四其餘九亦以待封王之子弟三孤之田
不副者以其無職佐公論道耳雖有致仕猶可即而謀

焉盼讀爲班音義

盼音班賦也

疏

正義曰此經明天子縣內國數多少及祿士之法案

殷之與周稱畿唐虞稱服無云縣者今此特云縣內故鄭云夏時天子所居州界名也案鄭注益稷云禹會諸侯於塗山執玉帛者萬國四百國在畿內今此畿內惟有九十三國者蓋夏之一代畿內稱縣當夏禹之初有四百國至夏之末土地既減故與禹世不同未知於時縣內國數多少湯承夏末之後制爲九十三國記者言縣明其承夏之餘國數是殷湯之制故與四百國不同也名山大澤不以盼者畿外列士諸侯有封建之義故云不以封畿內之臣既不世位有盼賜之義故云不以盼所以不盼者亦爲與民共財不障管也雖不障民取其財物亦入之玉府即周禮山虞澤虞所掌是也其餘以祿士以爲閒田者謂九十三國之餘則下文云其餘方百里者六十四方十里者九十六是也以九十三國以封公卿大夫故特云以祿士其實公卿之子父死之

後既不世爵得食父祿故下文云大夫不世爵未賜爵視天子之元士以君其國是九十三國之外既云視元士則此祿士包之也其不封公卿大夫及祿士之外並爲閒田則周禮云公邑也不云附庸者以縣內無附庸也所以畿外州建二百一十國之外則閒田少畿內立九十三國之外閒田多者以畿外諸侯有大功德始有附庸故閒田少畿內每須盼賜故閒田多依周禮閒田自二百里之外以至五百里其大夫則於三百里爲采地卿則於四百里爲采地公則於五百里爲采地故戴師云以公邑之田任甸地以家邑之田任稍地以小都之田任縣地以大都之田任疆地是也未知殷制如何其周之畿內采邑大小未聞則鄭注小司徒云百里之國凡四都五十里之國凡四縣二十五里之國凡四甸是謂畿內大國百里次國五十里小國二十五里又注大司徒云畿內之制未聞是知疑而不定此云祿士謂無地之士給之以地而當其祿不得爲采邑耳其實春

秋之時公卿亦有無地者故春秋經劉子單子是有地者稱爵王子虎卒是無地者不稱爵也注正義曰引詩殷頌者是玄鳥祀高宗之篇證殷稱畿也云周亦曰畿者周禮職方云千里曰王畿是也云爲有致仕者副之者以三公在朝既有正田今身既致仕不可仍食三公采邑身又見存不可全無其地故公卿大夫皆有正職之田又有致仕副邑云其餘三待封王之子弟者禮運云天子有田以處其子孫又周禮有都宗人家宗人祭祀皆致福於王是有封王之子弟也但王之子弟有同母異母有親疏之異親寵者封之與三公同平常者與六卿同疏遠者與大夫同故有三等之差也云三孤之田不副者自上差之三公之外其餘有三卿之外其餘有六大夫之外其餘有九皆以次相三若三孤有致仕之副則卿與公同其餘三非差次也云以其無職佐公論道耳雖有致仕猶可即而謀焉者案周禮三公雖無正職猶列於官參六卿之事故司徒云鄉老二卿則公

一人三孤則不列於官故云無職但佐公論道在朝在家其事一等雖退致仕猶可就而謀事不須致仕之後朝上更別立官故知不有致仕之副

凡九州千七百七十三國天子之元士諸侯之附庸不與注不與不在數中也春秋傳云禹會諸侯於塗山執玉帛者萬國言執玉帛則是惟謂中國耳中國而言萬國則是諸侯之地有方百里有方七十里有方五十里者禹承堯舜而然矣要服之內地方七千里乃能容之夏末既衰夷狄內侵諸侯相并土地減國數少殷湯承

之更制中國方三千里之界亦分爲九州而建此千七百七十三國焉周公復唐虞之舊域分其五服爲九其要服之內亦方七千里而因殷諸侯之數廣其土增其爵耳孝經說曰周千八百諸侯布列五千里內此文改周之法闕盛衰之中三七之間以爲說也終此說之意五五二十五方千里者二十五其一爲畿內餘二十四州各有方千里者三其餘諸侯之地大小則未得而聞

音義

與音預注及下注不與同塗音徒要一遙反下要服皆同并必政反又如字減古斬反闕盛衰並讀

如疏正義曰此一節總明殷之畿內畿外國數之法前

文云凡四海之內明殷之畿外諸侯次經明天子

縣內殷之畿內國數此經總明殷之畿內畿外故云凡

九州千七百七十三國天子之元士諸侯之附庸不在

數中故云不與商王大計地方三千里畿外八州每一

州二百一十國封爵三等八州一千六百八十國并王

畿內九十三國計千七百七十三國天子之元士則下

云方百里者六十四方十里者九十六是天子之元士

又下云其餘方百里者十方十里者六十是諸侯附庸

不在千七百七十三之數注正義曰引春秋傳者哀七

年左傳文時魯欲伐邾孟孫不欲諸大夫答孟孫云禹

會諸侯於塗山執玉帛者萬國今其存者無數十焉又

襄二十五年傳云若無侵小何以至焉杜預云塗山在

壽春東北與會稽別也若鄭康成之意塗山則會稽也

故注尚書云禹朝羣臣於會稽執玉帛者萬國是以張

逸疑而問鄭案左傳禹會諸侯於塗山執玉帛者萬國

外傳云禹朝羣臣於會稽防風氏後至不與注相應何
鄭答云欲明諸侯守土之祀故兼用外傳內傳語者鄭
意以塗山會稽爲一以諸侯爲守土之祀故云禹朝羣
臣羣臣則諸侯也鄭云兼用外傳內傳語者禹朝羣臣
於會稽是外傳語執玉帛者萬國是內傳左氏語云言
執玉帛則是惟謂中國耳者案覲禮諸侯享王璧以帛
是執玉帛也案大行人侯甸男采衛要各以其服貢物
下云九州之外謂之蕃國各以其所貴寶爲摯鄭注貴
寶若白狼白鹿夷狄不執玉帛故云執玉帛惟謂中國
耳云中國而言萬國則是諸侯之地有方百里有方七
十里有方五十里者鄭言此者以周之大國方五百里
而下則不得有萬國故云然也案萬國之數注在卑陶
謨堯初制五服更五百里禹所弼每服五百里故始有
百里之封焉猶用要服之內爲九州州立十二人爲諸
侯師蓋百國一師則州十有二師則每州千二百國也
八州九千六百國其餘四百國在畿內鄭又云百里者

三分國七有奇所以百里三封國七者以百里之方一
爲公侯之國一又以百里之方一爲伯七十里之國二
又以百里之方一爲子男五十里之國四是百里之方
三封國七也言有奇者謂百里之方一封七十里之國
二有奇者以百里之方一爲十里之方百七十里之國
一用十里之方四十九七十里之國二用十里之方九
十八餘有十里之方二故云有奇以此計之州有千里
之方六以千里之方二爲公侯之國二百又以千里之
方二爲伯七十里之國四百有奇又以千里之方二爲
子男五十里之國八百總爲一千四百國以二百國及
奇餘爲附庸山澤故州有千二百國鄭云四百國在畿
內者以大略據子男爲言非實法也趙商不達鄭旨而
問鄭云以王制論之畿內之國有百里有七十里有五
十里今率以下等計之又有王城關雒郊郭卿大夫之
采地數不在中今就四百似頗不合鄭答之云三代異
物王制之法唐虞或不盡然堯舜之德守在四疆鄉遂

有無無以言也公卿大夫有田祿者其四百國非采地
爲何王城之大郊闕之處幾何而子青急也此鄭亦隨
問而答非事實也必知非實者以地形不可方平如圖
又有山澤不封之地何有同積棊無空缺之處故知略
計地爲四百國耳云禹承堯舜而然矣者以堯未遭洪
水之前帝德寬廣不制以法故中國五千禹因治水之
後德化漸大故中國更廣而有萬國云要服之內地方
七千里乃能容之者王畿內五百里又五百里外侯服
去城外五百里是一千里又五百里甸服是一千五百
里又五百里男服是二千里又五百里采服是二千五
百里又五百里衛服是三千五百里又五百里爲要服是三
千五百里要服去王城三千五百里四面相距爲七千
里是九州之內此云要服之內地方七千里也案尚書
咎繇謨禹弼成五服去王城五百里曰甸服其弼當侯
服去王城千里其外五百里爲侯服當甸服去王城一
千五百里其弼當男服去王城二千里又其外五百里

爲綏服當采服去王城二千五百里其甸當衛服去王城三千里又其外五百里爲要服與周要服相當去王城三千五百里四面相距爲七千里是九州之內也故此云要服之內地方七千里咎繇注又云要服之甸當其夷服去王城當四千里又其外五百里曰荒服當鎮服其甸當蕃服去王城五千里四面相距爲方萬里也云夏末既衰夷狄內侵諸侯相并土地減國數少者以湯承於夏末中國惟方三千里明所因有漸承夏末之地地上云天子縣內是夏末殷初其界相似也必知此王制之文以爲殷制者正以百里七十里五十里之國與周不同又千七百七十三國與禹萬國數復異又虞夏及周皆曰牧此經稱伯故知大略皆據殷而言也其天子七廟及下雜論虞夏商周四代之制亦兼載焉云周公復唐虞之舊域分其五服爲九其要服之內亦方七千里者言復唐虞舊域謂治水之後舊域也案周禮職方云方千里曰王畿其外方五百里曰侯服又其外方

五百里曰甸服又其外方五百里曰男服又其外方五百里曰采服又其外方五百里曰衛服又其外方五百里曰蠻服又其外方五百里曰夷服又其外方五百里曰鎮服又其外方五百里曰蕃服蠻服則要服是分其五服爲九以要服之內方七千里也云因殷諸侯之數廣其土增其爵耳者案洛誥傳云天下諸侯之來進受命於周退見文武尸者千七百七十三諸侯其數與此同是周因殷諸侯之數也案大司徒公五百里侯四百里與此公侯百里不同是廣其土也殷爵三等周爵五等是增其爵耳云孝經說曰周千八百諸侯布列五千里內者此孝經緯文云千八百者舉成數其實亦千七百七十三諸侯也布列在中國五千里之內云此文改周之法闕盛衰之中三七之間以爲說也者此文謂此孝經緯文改周之法謂改周公盛時之法盛謂地方七千里衰謂地方三千里故云闕盛衰之中三七之間若指文言之盛謂周公制禮太平時也衰謂夏末殷初之

時也盛衰之中謂武王時也若以當代言之衰謂周末
幽厲之時與夏末同盛衰之中謂昭王恭王之時與武
王同云終此說之意者謂終竟此孝經緯所說之意云
其餘諸侯之地大小則未得而聞者謂一州之內千里
之方有三而一州建二百一十國但未知國之大小及
封建制度故云未聞異義公羊說殷三千諸侯周千八
百諸侯古春秋左氏傳說禹會諸侯於塗山執玉帛者
萬國唐虞之地萬里容百里地萬國其侯伯七十里子
男五十里餘爲天子閒田許慎謹案易曰萬國咸寧尚
書云協和萬邦從左氏說鄭駁之云而諸侯多少異世
不同萬國者謂唐虞之制也武王伐紂三分有二千八
百諸侯則殷末諸侯千八百也至周公制禮之後準王
制千七百七十三國而言周千八百者舉其全數又異
義今尚書歐陽夏侯說中國方五千里古尚書說五服
旁五千里相距萬里許慎謹案以今漢地考之自黑水
至東海衡山之陽至於朔方經略萬里從古尚書說鄭

氏無駁與許同案易下繫云一君二民君子之道二君一民小人之道鄭注一君二民謂黃帝堯舜謂地方萬里爲方千里者百中國之民居七千里七七四十九方千里者四十九夷狄之民居千里者五十一是中國夷狄二民共事一君二君一民謂三代之末以地方五千里一君有五千里之土五五二十五更足以一君二十五始滿千里之方五十乃當堯舜一民之地故云二君一民實無此二君一民假之以地廣狹爲優劣也

天子百里之內以共官千里之內以爲御注謂此地之

田稅所給也官謂其文書財用也御謂衣食音義

共音恭

疏正義曰此一節論畿內千里之地田稅所共給之事注正義曰經云百里之內者謂去王城百里四面相

距則五百里經云千里之內以爲御者謂四面相距爲千里去王城四面五百里二者相互云此地之田稅所

給也者依周禮有口率出泉恐此是口率之泉故云此地之田稅所給也知非口率出泉所給者案周禮天府九賦之泉各有所給故其職云關市之賦以待王之膳服邦中之賦以待賓客四郊之賦以待稍秣家削之賦以待匪頒邦甸之賦以待工事邦縣之賦以待幣帛邦都之賦以待祭祀山澤之賦以待喪紀幣餘之賦以待賜予是口率出泉各有所用也知官謂其文書財用也者以其稱官是官府所須故爲文書財用御是進御所須故爲衣食但官是卑褻故用近物御爲尊重故用遠物此爲殷法也但未知有口率出泉與否

千里之外設方伯五國以爲屬屬有長十國以爲連連有帥三十國以爲卒卒有正二百一十國以爲州州有伯注屬連卒州猶聚也伯帥正亦長也凡長皆因賢侯

爲之殷之州長曰伯虞夏及周皆曰牧音義

帥色類反注及下同

卒子忽反下及

注同牧音木 八州八伯五十六正百六十八帥三百

三十六長八伯各以其屬屬於天子之老二人分天下

以爲左右曰二伯注老謂上公周禮曰九命作伯春秋

傳曰自陝以東周公主之自陝以西召公主之音義

陝朱

冉反一音古洽反召詩照反

疏正義曰此一節論千里之外設方伯及連帥卒正兼二伯之事各隨文解

之注正義曰屬是繫屬連是連接卒是卒伍州是聚居故云屬連卒州猶聚也伯帥正俱是長但異其名云凡長皆因賢侯爲之者既長諸侯非賢不可故知賢侯爲之言因者因其州內賢侯非州外別取州牧則知以賢

侯爲之故下曲禮以侯爲牧周制牧下有二伯則侯伯
皆得爲之故詩旄丘責衛伯也衛是侯爵而爲州伯張
逸疑而問鄭鄭答云侯德適任之謂衛侯之德適可任
州伯也然則伯之賢者亦可進爲牧故周禮宗伯八命
作牧注云謂侯伯有功德者加命得專征伐是伯得爲
牧也鄭必知州牧之下更有二伯者以左傳云五侯九
伯服杜皆爲五等諸侯九州之伯鄭答志云若征五等
諸侯九州之伯何夾輔之有太公爲王官伯分主自陝
以東不可分爲四侯半故稱五侯四州有八伯畿內有
一伯故爲九伯也案鄭志注尚書爲八伯張逸問云九
州而八伯者何鄭答云畿內之州不置伯有鄉遂之吏
主之伯即牧也故周禮大宰云施典于邦國建其牧立
其監是畿外邦國有牧畿內不置也畿內既不置牧則
應無牧下之伯而云五侯九伯畿內有一伯者但比擬
畿外應有而言之其實無也州長既用賢侯爲之則卒
正連帥屬長節級用伯子男賢者而爲之鄭注曲禮云

二王之後不爲牧則殷亦當然殷既亦有連屬卒等則周亦然也故詩旄丘責衛伯不能修方伯連率之職是也云虞夏及周皆曰牧者案尚書舜典云覲四岳羣牧又云咨十有二牧是虞稱牧也虞雖稱牧亦稱伯故書傳云惟元祀巡此四岳八伯案左傳宣三年云夏之方有德也貢金九牧是夏稱牧也大宰云建其牧是周稱牧也故云虞夏及周皆曰牧九命作伯大宗伯職文春秋傳曰以下春秋隱五年公羊傳文故傳云三公者何天子之相也自陝而東者周公主之自陝而西者召公主之一相處乎內是也

千里之內曰甸注服治田出穀稅音義甸大千里之外

曰采注九州之內地取其美物以當穀稅音義采蒼改

浪反又曰流注謂九州之外也夷狄流移或貢或不禹如字

貢荒服之外三百里蠻二百里流音義

蠻莫疏正義曰還反此一節

總論畿內畿外九州治田及采取美物并九州之外或貢或否之事各隨文解之注正義曰定本直云服治田出穀稅無甸字知甸是服治田出穀稅者案禹貢五百里曰甸服下又云百里賦納總二百里納鉅及結粟米之等是甸爲治田也九州之內地者經文千里之外曰采謂規方千里之外若於王城五百里之外以殷制言之中國方三千里而面別去王城千五百里今五百里以爲畿內千里之外惟千里耳采取美物故言曰采周則王畿之外面別三千里采取美物則大行人侯服其貢祀物甸服其貢嬪物男服其貢器物采服其貢服物衛服其貢材物要服其貢貨物是也二百里流者流謂九州之外或貢或否流移不定殷則面別千五百里之外二千五百里之內謂之爲流周三千五百里之外五千里之內爲流也

天子三公九卿二十七大夫八十一元士注此夏制也

明堂位曰夏后氏之官百舉成數也疏

正義曰此一經論夏天子設公

卿大夫元士之數注正義曰以周禮其官三百六十此官百二十故云夏制以夏制不明更引明堂位夏后氏之官百以證之直云百不云百二十故云舉成數也王制之文鄭皆以爲殷法此獨云夏制者以明堂殷官三百與此百二十數不相當故不得云殷制也記者故雜記而言之或舉夏或舉殷也

大國三卿皆命於天子下大夫五人上士二十七人次國三卿二卿命於天子一卿命於其君下大夫五人上士二十七人小國二卿皆命於其君下大夫五人上士

二十七人注命於天子者天子選用之如今詔書除吏是矣小國亦三卿一卿命於天子二卿命於其君此文

似誤脫耳或者欲見畿內之國二卿與音義

選宣應反見賢遍反

與音疏

正義曰此一節論夏家天子命諸侯之國卿大夫及士之數前既云夏官此亦夏禮卿大夫士

數五等之國悉同但大國三卿並受命於天子也夏之大國謂公與侯也殷周大國並公也崔氏云三卿者依周制而言謂立司徒兼冢宰之事立司馬兼宗伯之事立司空兼司寇之事故春秋左傳云季孫爲司徒叔孫爲司馬孟孫爲司空此是三卿也以此推之故知諸侯不立冢宰宗伯司寇之官也下大夫五人者崔氏云三卿命於天子則大夫以下皆其君自命之也三卿則上中下三品而含上下今云下大夫五人者取卿爲言耳

知大夫有上下者案前云次國之下卿位當大國之上大夫是也何以五人者謂司徒之下置小卿二人一是小宰一是小司徒司空之下亦置二小卿一是小司空一是小司空也司馬之下惟置一小卿小司馬也故公羊襄十一年作三軍三軍者何三卿也古者上卿下卿上士下士何休云古者諸侯有司徒司空上卿各一下卿各二司馬事省上下卿各一若有軍事上士相上卿下士相下卿足以爲治今襄公乃益司馬故云作三軍踰王制故譏之下卿即大夫也故此云下大夫五人上士二十七人云上士者對府史之屬也周禮五等國悉三卿五大夫二十七士皆與此同但公國長有四命孤一人故典命云公之孤四命以皮帛眡小國之君其鄉三命其大夫再命其士壹命侯伯之卿大夫士亦如之子男之卿再命其大夫壹命其士不命而鄭注再引王制以成彼義當恐周之人數與王制同也且曾子問是明當時周法而云國家五官則五大夫大夫若五則知

餘亦不異也且冢宰云施典於邦國設其參傳其伍鄭云參謂卿三人伍謂大夫五人次國三卿二卿命於天子一卿命於其君下大夫五人上士二十七人者次國者夏則伯殷則侯也周則侯伯也而卿大夫士之命及人之數與大國同但一卿其君自命爲異也下文傳也小國二卿皆命於其君下大夫五人上士二十七人者小國者殷謂伯夏周同子男也案鄭注言小國亦三卿差次而言應一卿命於天子二卿命於其君此惟言二卿則似誤也鄭何以得知應三卿案前云小國又有上中下三卿位當大國之下大夫若無三卿何上中下之有乎故知有三卿也案周禮三命受位鄭云謂此列國之卿始有列位於王爲王之臣也若三命卿始得列位於王則子男之卿再命不應得一卿命於王而鄭今云一卿命於王者謂子男之卿亦得王命而彼注三命下云列國卿三命者此自據侯伯爲言以會彼三命受位者耳注正義曰鄭又爲一說畿內之國唯置二卿並是

其君自命之今記者或欲因子男此又以見畿內之法故捨去子男一卿命於王者而不言也

天子使其大夫爲三監監於方伯之國國三人注使佐

方伯領諸侯音義

監古雙反監於古銜反卷末同疏正義曰此一節論

方伯之國州別各置三人之事天子使其大夫者謂使在朝之大夫往監於方伯每一州輒三人三八二十四人崔氏云此謂殷之方伯皆有三人以輔之佐其伯謂監所領之諸侯也周則於牧下置二伯亦或因殷使大夫爲三監故燕禮云設諸公之坐鄭云公孤也大國孤公一人而云諸公者容牧有三監然則天子於州牧之國別置三大夫以輔之其尊卑之差則下文其祿視諸侯之卿其爵視次國之君其祿視諸侯之卿者謂公之孤也故燕禮謂之諸公與公孤同也尚書使管叔蔡叔霍叔爲三監者爲武庚也與此別也

天子之縣內諸侯祿也注選賢置之於位其國之祿如

諸侯不得世疏

正義曰此一經論天子縣內食采邑諸侯得祿不得繼世之事此言縣內則夏

法也言諸侯祿者得采國爲祿而不繼世故云祿也故

下云大夫不世爵是也此謂畿內公卿大夫之子父死

之後得食父之故國采邑之地不得繼父爲公卿大夫

也故經直云祿也則子孫恆得食之有罪乃奪之此云

諸侯下云大夫不世爵則諸侯總據大夫以上而司裘

諸侯則共熊侯豹侯鄭注云諸侯謂三公及王子弟鄭

惟據三公及王子弟者以下別云卿大夫則共廩侯故

諸侯惟止三公及王子弟而已此父死子祿者不在九

十三國之數此雖論夏法殷周亦然畿內諸侯父死視

元士若有賢德乃復父位若畿外諸侯父死未賜爵亦

視元士除服則得襲父故位故下文云未賜爵視天子

元士以君其國注云列國及縣內之國也必知列國未

賜爵亦視元士者以詩云棘韜有夷以作六師
是諸侯世子未爵命服士之棘韜之服是也 外諸侯

嗣也注有功乃封之使之世也冠禮記曰繼世以立諸

侯象賢也音義

冠古疏正義曰此一經論外諸侯父死

世象賢傳嗣其國也故下云諸侯世子世國所以畿內
諸侯不世爵而畿外得世者以畿內諸侯則公卿大夫
輔佐於王非賢不可故不世也畿外諸侯嘗有大功報
其勞効又在外少事故得世也異義案公羊穀梁說云
卿大夫世則權并一姓妨塞賢路經譏尹氏崔氏是也
古春秋左氏說卿大夫得世祿不世位父爲大夫死子
得食其故采地如有賢才則復父故位許慎謹案易爻
位三爲三公食舊德謂食父故祿尚書云世選爾勞論
語云興滅國繼絕世詩云凡周之士不顯亦世孟子云
文王之治岐也仕者世祿知周世祿也從左氏義鄭氏

無駭與許同殷之大夫亦世祿故祭義云殷人貴富而尚齒注云臣能世祿曰富是也其諸侯之大夫則下文云不世爵祿謂殷禮也若周制諸侯之大夫有功者亦得世祿故隱公八年無駭卒左傳云官有世功則有官族論語云管氏奪伯氏駢邑三百以無功而奪之若有功則不奪也

制三公一命卷若有加則賜也不過九命次國之君不過七命小國之君不過五命注卷俗讀也其通則曰衮三公八命矣復加一命則服龍衮與王者之後同多於此則賜非命服也虞夏之制天子服有日月星辰周禮曰諸公之服自衮冕而下如王之服音義

命卷音衮古本反復扶又

反冕疏 正義曰此一經論王制三公已下次國小國之音勉疏 君爵命之數制謂王者制度言王者制度三公

八命身著鷩冕若加一命則爲上公與王者之後齊同而著衮冕故云一命卷若有加則賜也者謂九命卷龍之外依制不合有其服若有加益者則是君之特賜非禮法之常也則雜記謂之褒衣也此則禮緯九賜之衣服也與宗伯再命受服不同此篇之作皆是王者之制而於此特言制者以三公位尊又加一命其事極重記者以其重故特云制也不過九命不過七命不過五命者此謂夏殷之制也亦與周同注正義曰禮記文皆作卷字是記者承俗人之言故云卷俗讀也云其通則曰衮者謂以通理正法言之則曰衮故周禮司服又覲禮皆作衮是禮之正經也故云其通則曰衮云虞夏之制天子服有日月星辰者以此經雖以殷爲主亦雜記虞夏之事故鄭引虞夏之制言之案有虞氏皇而祭之下注云夏殷未聞此云虞夏之制天子服有日月星辰者

此云特謂虞舜與禹相接事相關穿故尚書堯舜禹之書謂之虞夏書伏生書傳有虞夏傳以臯陶謨云予欲觀古人之象臯陶謨是虞夏之書故云虞夏之制其實虞也下文有虞夏殷周四代並陳故云夏殷未聞也云周禮曰諸公之服自袞冕而下如王之服者是司服文引之者證三公一命袞然則此經三公一命袞謂周制也故以周制解之若周以前則山在袞上不得云一命袞也衣服之制歷代不同案易繫辭云黃帝堯舜垂衣裳而天下治蓋取諸乾坤玄衣法天黃裳法地故易坤六五黃裳元吉是也衣裳從黃帝以來而有也虞氏以來其裳用纁故下文歷陳虞夏殷周注云其服皆玄上纁下裳用纁者鄭注易下繫辭云土託位南方南赤黃而兼赤故爲纁也案禮祭地牲玉用黃以放地色裳既法地而用纁者凡衣服著其身有章采文物以黃色太質故用纁也衣爲天色玄禮天牲玉用蒼者以天色畫則蒼夜則玄衣不用蒼亦以其太質故也然祭天

亦有牲用玄者尚書及論語云敢用玄牡敢昭告于皇
皇后帝是也虞夏之制天子祭服自日月而下十有二
章故尚書皋陶云予欲觀古人之象日月星辰山龍華
蟲作會宗彝藻火粉米黼黻絺繡是也日一也月二也
星辰三也山四也龍五也華蟲六也此六者皆畫於衣
故言作會以法於天其數六者法天之陽氣之六律也
宗彝七也藻八也火九也粉米十也黼十一也黻十二
也此六者皆繡於裳故云絺繡絺紵也謂紵刺以爲繡
文以法地之陰氣六呂也案鄭注司服云至周登龍於
山登火於宗彝尊其神明也龍取其神火取其明然則
諸物各有所象故說日月星辰取其明山者安靜養物
畫山者必兼畫山物故考工記云山以章龍者取其神
化龍是水物畫龍必兼畫水故考工記云水以龍華蟲
者謂雉也取其文采又性能耿介必知華蟲是雉者以
周禮差之而當鷩冕故爲雉也雉是鳥類其頸毛及尾
似蛇兼有細毛似獸故考工記云鳥獸蛇此六者以高

遠在上故畫於衣宗葬者謂宗廟葬尊之飾有虎雖二獸虎有猛雖能辟害故象之不言虎雖而謂之宗葬者取其美名案周禮有六葬有雜葬鳥葬罽葬黃葬虎葬雖葬此直云宗葬知非雜葬鳥葬黃必爲虎雖者案明堂位云夏后氏雖葬殷以罽周以黃目又周禮陳六尊六彝皆遠代者在後故六尊之次犧象著壺大山大是虞氏之尊山是夏后之尊六彝之次亦虎葬雖葬在後故知虎雖虞夏已飾於尊但舜時已稱宗葬不得有雜罽之等以周禮差之而當罽冕故知虎雖有毛之物也虎雖淺毛細毳故也藻者取其潔清有文火者取其明照烹飪粉米取其潔白生養黼謂斧也取其決斷之義黻謂兩已相背取其善惡分辨大意取象如此而皇氏乃繁文曲說橫生義例恐非本旨此是天子之服其諸侯以下未得而聞案臯陶謨云五服五章哉鄭注云五服十二也九也七也五也三也如鄭之意九也謂公侯之服自山而下七也是伯之服自華蟲而下五也謂子

男之服自藻而下三也。卿大夫之服自粉米而下與孝經注不同者，孝經舉其大綱，或云孝經非鄭注以上所云虞舜之制，而夏殷注云未聞。至周則日月星辰畫於旌旗，又登龍於山，登火於宗彝，故注司服云王者相變也。至周而以日月星辰畫於旌旗，所謂三辰旂旗，昭其明也。而冕服九章，初一日龍，次二曰山，次三曰華蟲，次四曰火，次五曰宗彝，皆畫以爲繡。六曰藻，次七曰粉米，次八曰黼，次九曰黻，皆紵以爲繡。則衮之衣五章，裳四章。凡九也。驚之衣三章，裳四章。凡七也。毳之衣三章，裳二章。凡五也。希之衣一章，裳二章。凡三也。玄者衣無文，裳刺黻而已。是以謂玄焉。鄭必知日月星辰畫於旌旗者，以司服王自衮冕而下，則衮服最尊，尚無日月星辰。故知日月星辰不在衣服。畫於旌旗也。知登龍於山者，依舊山在龍上，若不登龍，則衮冕不爲最尊。故知登龍於山也。知登火於宗彝者，若不登火，則五章之服自藻而下，不得稱爲毳冕。若登火於宗彝之上，則五章自宗彝

而下與毳冕相當然宗彝之下有藻火兩章知不登藻而必登火者火有光明之盛春秋傳云火龍黼黻禮記殷火周龍章是火貴於藻也故知登火不登藻自九章而下以次相差故知袞之衣五章驚衣毳衣皆三章希衣一章衣法天故章數奇裳法地章數偶以下其數漸少則裳上之章漸勝於衣事勢湏然非有義意皇氏每事曲爲其說恐理非也衣章並畫希冕之衣獨繡者以粉米地物養人服之以祭社稷又地祇並是陰類故衣章亦繡也周之衣服旣無日月而郊特牲云袞冕日月之章者謂魯禮也魯以周公之故袞冕亦日月之章其周之天子所用祭服則司服云王祀昊天上帝則服大裘而冕祀五帝亦如之享先王則袞冕享先公饗射則鷩冕祀四望山川則毳冕祭社稷五祀則希冕祭羣小祀則玄冕鄭司農云大裘羔裘也知羔裘者以祭天至質故知羔裘以天色玄謂黑羔裘其六冕所祀依冕之先後祭神之尊卑以袞冕之服華故祭先王以希冕陰

類故祭社稷五祀以玄冕質素故祭羣小祀日月雖尊以天神從質故亦玄冕故玉藻云天子玄端以朝日鄭注云端當爲冕其祭地之服無文案詩昊天有成命郊祀天地也天地相對則祭地亦用大裘故孝經援神契云祭地之禮與祭天同亦據衣服同也又有皮弁以日視朝韋弁以即戎冠弁以田獵故司服云凡兵事韋弁服注云韋弁以韎韋爲弁又以爲衣裳詩采芑注云韋弁服朱衣裳則韎韋也其事同鄭志又以韋弁爲素裳未知孰是司服又云眡朝則皮弁服鄭注云視朝視內外朝之事皮弁之服十五升白布衣積素以爲裳王受諸侯朝覲於廟則衮冕其皮弁又以燕諸公故詩云有頌者弁注云皮弁詩人責王不以皮弁燕諸公此則朝服燕也又以食故玉藻云皮弁以日視朝遂以食又郊祭之前服之以聽祭報故郊特牲云皮弁以聽祭報又著以舞大夏故明堂位云皮弁素積以舞大夏雖是魯禮王所同之其賓射燕射時亦皮弁也知者案射人

職賓射在朝故知用朝服也燕禮記云燕朝服於寢明
天子燕亦以朝服故知賓射燕射亦皮弁也司服又云
凡甸冠弁服注云甸獵也冠弁委貌其服緇布衣亦
積素以爲裳王卒食而居則玄端此玄端亦緇衣朱裳
故玉藻注云天子諸侯玄端朱裳謂之端者已外之服
其袂三尺三寸其袪尺八寸其玄端則二尺二寸袪尺
二寸端正也以幅廣二尺二寸袂廣二尺二寸與之正
方故云玄端也哭諸侯則爵弁故檀弓云天子之哭諸
侯也爵弁紒衣爵弁者如爵頭色又有素服凶荒則服
之故司服云大紮大荒大哉素服其衣服首飾大裘之
冕其冕無旒故注弁師云冕服有六而言五冕者大裘
之冕蓋無旒不聯數也凡冕之制皆玄上纁下故注弁
師云皆玄覆朱裏師說以木版爲中以三十升玄布衣
之於上謂之延也以朱爲裏但不知用布繪耳當應以
繒爲之以其前後旒用絲故也案漢禮器制度廣八寸
長尺六寸也又董巴與服志云廣七寸長尺二寸皇氏

謂此爲諸侯之冕應劭漢官儀廣七寸長八寸皇氏以爲卿大夫之冕服也若如皇氏言豈董巴專記諸侯應劭專記卿大夫蓋冕隨代變異大小不同今依漢禮器制度爲定也今天子五冕之旒皆用五采之絲爲旒垂五采之玉故弁師云掌王之五冕五采纁十有二就皆五采玉十有二鄭注云每就間蓋一寸旒別有五采玉十有二衮冕故前後各十二旒用玉二百八十八驚冕九旒用玉二百一十六毳冕七旒用玉一百六十八希冕五旒用玉百二十玄冕三旒用玉七十二皮弁縫中亦五采玉十二故弁師云王之皮弁會五采玉璆鄭注云會縫中也縫中每貫結五采玉十二以爲飾韋弁亦然故弁師云諸侯及孤卿大夫之冕韋弁皮弁弁經各以其等爲之則知天子韋弁與皮弁同也其冠弁亦與皮弁同故注弁師云不言冠弁冠弁兼於韋弁皮弁矣自此以前皆王者之服祭服則以衣名冕象上古先有衣後有冕皮弁以下則以弁名衣餘服既輕舉爲重故

也其諸侯以下則司服云公之服自衮冕而下侯伯之服自鷩冕而下子男之服自毳冕而下孤之服自希冕而下卿大夫之服自玄冕而下士之服自皮弁而下公衮之衮冕數與王同其就數則異故鄭注覲禮云上公衮無升龍其旒則九不十二也其三公司服無文案射人三公執璧與子男同則服毳冕也凡此諸侯所著之服皆爲助祭於王若助王祭天地及祭先王大祀之等皆服已上之服若其從王祭祀小祀雖有應著上服皆遂王所著之服不得踰王也自在國祭其先君則皆玄冕故玉藻云諸侯玄端以祭鄭云端當爲冕其二王之後祭受命之王各服已上之服其自祭餘廟與諸侯同有孤之國其孤則希冕卿大夫玄冕士爵弁此皆謂助君祭服也無孤之國卿希冕大夫玄冕以注玉藻云諸侯之臣皆分爲三等其夫卿也則服鞠衣其夫大夫則服禮衣其夫士則服祿衣以此言之卿希冕大夫玄冕士爵弁也此服皆謂助祭君也若其自祭則皆降焉諸侯

士則玄端大夫則朝服儀禮特牲士祭玄端少牢上大
夫祭朝服公之孤爵弁以自祭故雜記云大夫冕而祭
於公弁而祭於已士弁而祭於公冠而祭於已鄭注云
爵弁而祭於已唯孤爾其天子卿大夫則無文諸侯當
玄冕以祭其孤卿之等當爵弁也大夫則皮弁知者以
諸侯大夫朝服自祭故知天子大夫亦用朝服自祭朝
服則皮弁故鄭注玉藻云四命以上齊祭異冠案玉藻
云玄冠丹組纓諸侯之齊冠也諸侯既用玄冠而齊則
孤卿大夫以下並用玄冠齊也諸侯玄冕而祭天子孤
卿及公之孤卿爵弁而祭天子大夫皮弁而祭之皆與
齊時玄冠不同故云四命以上齊祭異冠其三命以下
玄冠齊玄冠祭是齊祭同冠其諸侯則皮弁以視朔朝
服以視朝韋弁以即戎與天子同諸侯田獵亦用韋弁
故左傳衛獻公射鴻於囿不釋皮冠而與孫林父言又
昭十二年楚子狩於州來皮冠豹舄諸侯又以皮弁受
聘享故聘禮公皮弁天子諸侯亦以玄端燕居故玉藻

注云天子諸侯玄端朱裳是也諸侯亦以朝服食夕則深衣故玉藻云朝服以食夕深衣祭牢肉又大祥之祭服朝服故喪服小記除成喪者其祭也朝服縞冠大祥以後則麻衣麻衣則白布深衣也但緣之以布耳又有長衣遭喪權時所服故聘禮云主國之喪主人長衣待賓是也其長衣制與深衣同但緣之以素長衣之袂稍長故玉藻注云長衣中衣繼揜尺深衣則緣而已其中衣制如長衣在上服之自天子以下皆有若祭服中衣用素故詩云素衣朱襮其他服中衣用布故玉藻云以帛裏布非禮也其天子卿大夫士以皮弁爲朝服諸侯卿大夫士以玄冠緇衣素裳爲朝服凡在朝君臣上下同服但士服則謂之玄端袂廣二尺二寸故也其大夫以上則皆侈袂袂三尺三寸故也其大夫以上所論玄端者皆其制與士同其大夫士案玉藻云朝玄端夕深衣其大祥朝服及既祥麻衣並與諸侯同天子祥禫其服無文或亦與諸侯無異其首飾諸侯皆以三采爲藻

垂三采之玉公衮冕九旒鷩冕七旒毳冕五旒希冕三旒玄冕蓋無旒旒皆九玉侯伯鷩冕七旒以下與公同旒皆七玉子男毳冕五旒以下與公同旒皆五玉若熊氏之義分以下諸冕其旒並依命數不減其韋弁皮弁冠弁縫中之玉各依命數玉皆三采朱白蒼也孤希冕而下其旒及玉皆二采朱綠各依命數其皮弁韋弁冠弁玉亦二采各依其命數其一命大夫玄冕及士則爵弁皆無旒知諸侯以下首飾藻旒玉數如此者案弁師云諸侯及孤卿大夫之冕韋皮弁各以其等爲之故鄭注云纁旒玉璫如其命數也冕則侯伯纁七就用玉九十八子男纁五就用玉五十纁玉皆三采孤纁四就用玉三十二三命之卿纁三就用玉十八再命之大夫藻再就用玉八藻玉皆朱綠韋皮弁則侯伯璫飾七子男璫飾五玉亦三采孤則璫飾四三命之卿璫飾三再命之大夫璫飾二玉亦二采一命之大夫冕而無旒士喪冕爲爵弁其韋皮弁之會無結飾不言冠弁冠弁

兼於韋弁
皮弁是也

大國之卿不過三命下卿再命小國之卿與下大夫一

命注不著次國之卿者以大國之下互明之此卿命則

異大夫皆同周禮公侯伯之卿三命其大夫再命子男

之卿再命其大夫一命疏

正義曰此一節論大國小國卿大夫命數多少不同之事

注正義曰經直云大國之卿及小國之卿不云次國故云不著次國之卿云以大國之下互明之者以大國之卿不過三命則知次國之卿不過再命大國下卿再命則知次國下卿一命故云互明之云此卿命則異者以大國上卿三命下卿再命次國上卿再命下卿一命小國上下卿並皆一命故云卿命則異云大夫皆同者謂

大國次國小國大夫皆同一命今經云小國之卿與下
大夫一命既與小國連文知非直據小國下大夫一命
者以經云大國下卿再命以次差之明大夫一命自然
次國大夫亦一命故云大夫皆同此夏殷制也案周禮
云公國之孤四命與餘卿不同則知此大國之卿不過
三命亦謂孤也大國下卿再命者謂除孤以外之卿就
再命之中分爲中卿下卿也故前文云次國之上卿位
當大國之中是也次國之卿再命亦謂上卿執政者若
魯之季孫下卿一命亦分爲中下二等故前文云中當
其下下當其上大夫是也小國之卿雖同一命亦分爲
三等故前文云小國之上卿位當大國之下卿中當其
上大夫下當其下大夫其大國次國小國大夫雖同一
命當皆分爲上下二等文已具於上今總云下大夫者
對卿言之云周禮公侯伯之卿三命以下者皆周禮典
命文以經云大國之卿不過三命故引公侯伯之卿三
命以對之周禮公之孤四命不與三命相當故不引之

也

凡官民材必先論之注論謂考其德行道藝音義

行下孟反

論辨然後使之注辨謂考問得其定也易曰問以辨之

任事然後爵之注爵謂正其秩次音義

任而鵠反

位定然後

祿之注與之以常食音義

與如字疏

正義曰此一節論擇賢材任以爵祿

之事各隨文解之任事然後爵之者爵謂正其秩次言雖考問知其實有德行道藝未明其幹能故試任以事

事又幹了然後正其秩次除授位定然後與之以祿注正義曰辨謂考問得其定也者謂官其人必先論量德

行道藝今論量考問事已分辨得其定實故云辨謂考問得其定也引易曰問以辨之是易文言文

爵人於朝與士共之刑人於市與衆棄之注必共之者
所以審慎之也書曰克明德慎罰是故公家不畜刑人
大夫弗養士遇之塗弗與言也屏之四方唯其所之不
及以政亦弗故生也注屏猶放去也已施刑則放之棄
之役賦不與亦不授之以田困乏及無賙餽也虞書曰
五流有宅五宅三居是也周則墨者使守門劓者使守
闕宮者使守內刖者使守圜髡者使守積音義
畜許六反涂音
徒本又作塗屏必政反去羌呂反賙音周餽許既反有
宅王肅注尚書如字鄭音知嫁反懲艾也下同劓魚氣

反則五刮反又音月圍音又髡五忽反疏正義曰此一
本又作完音同徐戶官反積子智反節論爵人及
刑人之事各依文解之此云爵人於朝謂殷法也周則
天子特假祖廟而拜授之故洛誥云烝祭歲文王騂牛
一武王騂牛一時冊命周公故特祭文武若諸侯爵人
因嘗祭之日故祭統云祭之日一獻君降立于阼階之
南南鄉所命北面是也刑人於市與衆棄之者亦謂殷
法謂貴賤皆刑於市周則有爵者刑於甸師氏也是故
公家不畜刑人者既與衆棄之以是之故天子諸侯之
家不畜刑人也大夫不得育養士遇刑人於塗弗與言
也謂逢過於塗不與之言屏之四方惟其所之者屏猶
放去也謂已施刑暴故放逐棄去使嚮四方量其罪之
輕重合所之適處而居之既是罪人被放不干及以政
教之事謂不以王政賦役驅使非但不使意在亦不欲
使生困乏又無賙餼直放之化外任其自死自生也注
正義曰役賦不與謂役賦之事不干與於刑人解經不

及以政云亦不授之以田因乏又無賙餼也者解經亦弗故生也田里所以安其身賙餼所以養其命皆是爲生之具今並不與是不故欲使其生也云虞書曰五流有宅五宅三居是也者證經屏之四方此云虞書者舜典文鄭注云宅讀曰咤懲刈之器謂五刑之流皆有器懲刈五咤者是五種之器謂桎一梏二箠三三居謂周之夷服鎮服蕃服云周則墨者使守門以下是周禮掌戮文案掌戮墨者使守門注云黥者無妨於禁御云劓者使守闕注云截鼻亦無妨以貌醜遠之云宮者使守內注云以夫道絕也云劓者使守圜注云斷足驅衛禽獸無急行云髡者使守積注云王之同族不宮之者髡頭而已守積積在隱者宜也引之者欲明周家畜刑人異於夏殷法也

諸侯之於天子也比年一小聘三年一大聘五年一朝

注比年每歲也小聘使大夫大聘使卿朝則君自行然此大聘與朝晉文霸時所制也虞夏之制諸侯歲朝周之制侯甸男采衛要服六者各以其服數來朝音義朝一直遙反數色角天子五年一巡守注天子以海內爲家反又所具反

時一巡省之五年者虞夏之制也周則十二歲一巡守

音義

守手又反本或作狩後巡守皆同省色景反

疏

正義曰此一經論諸侯遣卿大夫聘問及自親

朝之事注正義曰知小聘使大夫者案聘禮記云小聘曰問三介大聘使卿爲介有五入其小聘惟三介故知小聘使大夫云此大聘與朝晉文霸時所制也者案昭三年左傳鄭子大叔曰文襄之霸也其務不煩諸侯令

諸侯三歲而聘五歲而朝故云晉文霸時所制而晉文
霸時亦應有比年大夫之聘但子太叔畧而不言此亦
據傳文直云大聘與朝不云比年小聘案左傳文三年
聘五年朝諸侯相朝之法今此經文云諸侯之於天子
三年一大聘五年一朝則文襄之制諸侯朝天子與自
相朝同也如鄭此注唯據文襄故鄭云此晉文霸時所
制又鄭駁異義云公羊說比年一小聘三年一大聘五
年一朝以爲文襄之制錄王制者記文襄之制耳非虞
夏及殷法也熊氏或以此爲虞夏法或以爲殷法文義
雜亂不復相當曲爲解說其義非也云虞夏之制諸侯
歲朝者案尚書堯典云五載一巡守羣后四朝鄭注云
巡守之年諸侯朝於方嶽之下其間四年四方諸侯分
來朝於京師歲徧是也案孝經注諸侯五年一朝天子
天子亦五年一巡守熊氏以爲虞夏制法諸侯歲朝分
爲四部四年又徧總是五年一朝天子乃巡守故云諸
侯五年一朝天子天子亦五年一巡守案鄭注尚書曰

方諸侯分來朝於京師歲徧則非五年乃徧又孝經之注多與鄭義乖違儒者疑非鄭注今所不取熊氏之說非也虞夏之制但有歲朝之文其諸侯自相朝聘及天子之事則無文不可知也鄭此注虞夏之制即云周之制不云殷者虞夏及周經有明文故指而言之殷則經籍不見故不言也案春秋文十五年左傳云諸侯五年再相朝以修王命古之制也案鄭志孫皓問云諸侯五年再相朝不知所合典禮鄭答云古者據時而道前代之言唐虞之禮五載一巡守夏殷之時天子蓋六年一巡守諸侯間而朝天子其不朝者朝罷朝五年再朝似如此制禮典不可得而詳如鄭志之言則夏殷天子六年一巡守其間諸侯分爲五部每年一部來朝天子朝罷還國其不朝者朝罷朝諸侯至後年不朝者往朝天子而還前年朝者今既不朝又朝罷朝諸侯是再相朝也故鄭云朝罷朝也如鄭之意此爲夏殷之禮而鄭又云虞夏之制諸侯歲朝以夏與虞同與鄭志乖者以羣

后四朝文在堯典堯典是虞夏之書故連言夏其實虞也故鄭志云唐虞之禮五載一巡守今知諸侯歲朝唯指唐虞也其夏殷朝天子及自相朝其禮則然其聘天子及自相聘則無文也云周之制以下周禮大行人文故大行人云侯服歲壹見甸服二歲壹見男服三歲壹見采服四歲壹見衛服五歲壹見要服六歲壹見是六者各以其服數來朝皆當方分爲四部分隨四時而來鄭注大行人云朝貢之歲四方各四分趨四時而來是方別各爲四分也近東者朝春近南者宗夏近西者覲秋近北者遇冬故韓侯是北方諸侯而近於西故稱韓侯入覲鄭云秋見天子曰覲又鄭注明堂位云魯在東方朝必以春魯於東方近東故也以此言之則侯服朝者東方以秋南方以冬西方以春北方以夏以其近京師舉此一隅自外可知悉案大宗伯云春見曰朝注云朝猶朝也故其來之早夏見曰宗注云宗尊也欲其尊王秋見曰覲注云覲之言勤也欲其勤王之事冬見曰

遇注云遇偶也欲其若不期而俱至時見曰會注云時見者言無常期諸侯有不順服者王將有征討之事即春秋左傳云有事而會也殷見曰同注云殷衆也十二歲王如不巡守則六服盡朝四方四時分來歲終則徧每當一時一方總來不四分也此六者諸侯朝王之禮又諸侯有聘問王之禮故宗伯云時聘曰問注云時聘者亦無常期天子有事乃聘之焉殷類曰視注云殷類謂一服朝之歲以朝者少諸侯乃使卿以大禮衆聘焉一服朝在元年七年十一年其諸侯自相朝則大行人云凡諸侯之邦交歲相問也殷相聘也世相朝也注云小聘曰問殷中也久無事又於殷朝者及而相聘也父死子立曰世凡君即位大國朝焉小國聘焉鄭知久無事而相聘者案昭九年左傳稱孟僖子如齊殷聘禮也知凡君即位大國朝焉小國聘焉者以襄元年邾子來朝衛子叔晉知武子來聘左傳云凡諸侯即位小國朝之大國聘焉邾是小國故稱朝衛晉是大國故稱聘若

俱是敵國亦得來聘朝故司儀云諸侯相爲賓是也若
已初即位亦朝聘大國故文公元年公孫敖如齊左傳
云凡君即位卿出並聘若已是小國則往朝大國故文
十一年曹伯來朝左傳云即位而來見也其天子亦有
使大夫聘諸侯之禮故大行人云間問以諭諸侯之志
歲徧存三歲徧類五歲徧省間年一聘以至十一歲案
昭十三年左傳云歲聘以志業間朝以講禮再朝而會
以示威再會而盟以顯昭明賈逵服虔皆以爲朝天子
之法崔氏以爲朝霸主之法鄭康成以爲不知何代之
禮故異義云公羊說諸侯比年一小聘三年一大聘五
年一朝天子左氏說十二年之間八聘四朝再會一盟
許慎謹案公羊說虞夏制左氏說周禮傳曰三代不同
物明古今異說鄭駁之云三年聘五年朝文襄之霸制
周禮大行人諸侯各以服數來朝其諸侯歲聘間朝之
屬說無所出晉文公強盛諸侯耳非所謂三代異物也
是鄭以歲聘間聘朝文無所出不用其義也言晉文公

但強盛諸侯耳何能制禮而云三代異物乎是難許慎之辭也異義朝名公羊說諸侯四時見天子及相聘皆曰朝以朝時行禮卒而相逢於路曰遇古周禮說春曰朝夏曰宗秋曰覲冬曰遇許慎案禮有覲經詩曰韓侯入覲書曰江漢朝宗于海知其朝覲宗遇之禮從周禮說鄭駁之云此皆有似不爲古昔案覲禮曰諸侯前朝皆受舍于朝朝通名如鄭此言公羊言其總號周禮指其別名異義天子聘諸侯公羊說天子無下聘義周禮說問問以諭諸侯之志許慎謹案禮臣疾君親問之天子有下聘之義從周禮說鄭無駁與許慎同也云五年者虞夏之制者堯典云五載一巡守此正謂虞也以虞夏同科連言夏耳若夏與殷依鄭志當六年一巡守也云周則十二歲一巡守者大行人云十有二歲王巡守殷國故知周制十二年也案白虎通云所以巡守者何巡者循也守者收也爲天子循行守土牧民道德太平恐遠近不同化幽隱不得其所者故必親自行之謙敬

重民之至也所以不歲巡守何爲太煩過五年爲其太
疏因天道三歲一閏天道小備五歲再閏天道大備故
五年一巡守以此言之夏殷六歲者取半一
歲之律呂也周十二歲者象歲星一周也

歲二月東巡守至于岱宗注岱宗東嶽音義岱音代柴而

望祀山川注柴祭天告至也音義柴仕佳反依字作柴覲諸侯注

覲見也音義覲見如字舊賢遍反問百年者就見之注就見老人

命大師陳詩以觀民風注陳詩謂采其詩而視之音義

大音泰後大學大祖大子大樂正大史皆同命市納賈以觀民之所好惡志

淫好辟注市與市者賈謂物貴賤厚薄也質則用物貴

淫則侈物貴民之志淫邪則其所好者不正音義

賈音嫁注

同好呼報反下及注同惡烏路反辟匹亦反徐芳亦反侈昌氏反又式氏反邪似嗟反

命典禮考

時月定日同律禮樂制度衣服正之注同陰律也山川

神祇有不舉者爲不敬不敬者君削以地注舉猶宗也

音義

削息約反

宗廟有不順者爲不孝不孝者君絀以爵注

不順者謂若逆昭穆音義

絀丑律反退也昭常遠反凡言昭穆放此

變禮易

樂者爲不從不從者君流注流放也音義

樂音岳

草制度

衣服者爲畔畔者君討注討誅也有功德於民者加地

進律注律法也五月南巡守至于南嶽如東巡守之禮

八月西巡守至于西嶽如南巡守之禮十有一月北巡

守至于北嶽如西巡守之禮歸假于祖禰用特注假至

也特特牛也祖下及禰皆一牛音義嶽音岳下同假音格禰乃禮反父廟

也疏正義曰此一經論王者巡守四嶽柴望及絀陟之事各依文解之歲二月東巡守者皆以夏之仲月

以夏時仲月者律歷當得其中也二月八月又晝夜分五月十一月者陰陽終故取四仲月也覲諸侯者覲見

也謂見東方諸侯其見之禮案覲禮云諸侯覲於天子爲宮方三百步四門壇十有二尋深四尺鄭注云王巡

守至于方嶽之下諸侯會之亦爲此宮以見之是也覲禮又云天子乘龍載大旂拜日於東門之外反祀方明

鄭注引朝事儀曰天子冕而執鎮圭尺有二寸云帥諸侯而朝日於東郊所以教尊尊也退而朝諸侯由此二者言之已祀方明乃以會同之禮見諸侯也凡會同者不協而盟盟時設方明於壇上乃以載辭告焉如覲禮及鄭注所云既告至之後爲宮加方明於壇天子出宮東門外拜日反祀方明祀方明之後乃徹去方明故鄭云由此二者言之已祀方明乃以會同之禮見諸侯云二者謂覲禮經文朝日東門反祀方明朝事儀云朝日東郊退而朝諸侯故云由此二者言之則已祀方明乃以會同之禮見諸侯也今於覲禮未祀方明之前未有見諸侯之事皇氏以爲未祀方明之前已見諸侯非也其祀方明之後見諸侯之時王升立於壇上南面諸公中階之前北面諸侯東階之東西面諸伯西階之西東面諸子門東北面諸男門西北面王降階南面而見之三揖既升壇使諸侯升公拜於上等侯伯於中等子男於下等見諸侯訖若有不協更加方明於壇上諸侯等

俱北面或右傳敦血以授軟者司盟主其職故司盟云
掌其盟約之載及其禮儀北面詔明神於時王立無文
不可與諸侯同北面當於阼階上西面此是見諸侯之
禮祀方明之時祭天則燔柴也天謂日也與此岱宗柴
所用事別覲禮云祭天燔柴謂天子之盟也祭地瘞謂
王官之伯盟也祭山丘陵升及祭川沈者是諸侯之盟
也此是巡守及諸侯之盟祭也故注云升沈必就祭者
也就祭則是謂王巡守及諸侯之盟祭也祭天柴謂祭
日也祭地瘞者祭月也王巡守之盟其神主日諸侯之
盟其神主山川則王官之伯會諸侯而盟其神主月與
今此王制所主岱宗柴者謂祭天告至而覲禮注引王
制云王巡守至于岱宗柴是王巡守之盟其神主日又
以柴爲盟之所用不同者告至與盟必非一事鄭意證
巡守盟時有柴故引岱宗以證之其實別也覲禮云爲
宮即言加方明經文相連鄭注云王巡守至於方嶽之
下諸侯會之亦爲此宮則亦有方明但文不具耳故巡

守祭天燔柴祭地瘞埋皆是祭方明也故鄭於方明設六玉之下注云上宜以蒼璧下宜以黃琮而不以者則上下之神非天地之至貴者也以此言之明天子巡守之祭有方明也而皇氏云諸侯來就王會同有方明王巡守見諸侯無方明皇氏用之爲說其義非也問百年者就見之者此謂到方嶽之下見諸侯之後問百年者就見之若未至方嶽於道路之上有百年者則王亦先見之故祭義云天子巡守諸侯待於竟天子先見百年者下云八十九者東行西行者弗敢過道經之則見之則知百年者道雖不經所在就見之與此少別命大師陳詩以觀民風者此謂王巡守見諸侯畢乃命其方諸侯大師是掌樂之官各陳其國風之詩以觀其政令之善惡若政善詩辭亦善政惡則詩辭亦惡觀其詩則知君政善惡故天保詩云民之質矣日用飲食是其政和若其政惡則十月之交徹我牆屋田卒汙萊是也命市納賈者命與市之官進納物賈之書以觀民之所有

愛好所有嫌惡若民志淫邪則愛好邪辟之物民志所以淫邪由在上教之不正此陳詩納賈所以觀民風俗是欲知君上善惡也命典禮者典禮之官於周則大史也考校四時及十二月之大小時有節氣早晚月有弦望晦朔考之便各當其節又正定甲乙之日陰管之同陽管之律玉帛之禮鐘鼓之樂及制度衣服各有等差當正之使正堯典云協時月正日同律度量衡文雖小異大意與此同也山川神祇者山川是外神故云不舉不舉不敬也山川在其國境故削以地宗廟是內神故云不順不順不孝也宗廟可以表明爵等故絀以爵變禮易樂爲不從者禮樂雖爲大事非是切惡所須故以爲不從君惟流放制度衣服便是政治之急故以爲畔君須誅討此四罪先輕後重言五月南巡守至于南嶽者孔注尚書云自東嶽南巡守五月至則是從東嶽而去故鄭注尚書云每歸格于祖既言每歸似是嶽別一歸若嶽別一歸而更去便是路遠無由可至尚書既云

巡守四嶽既云五載一巡守鄭云每歸者謂每五年巡
守而歸也其南嶽西嶽北嶽者案爾雅釋山云泰山爲
東嶽郭景純注云泰山爲東嶽在奉高縣西北霍山爲
南嶽郭注山在衡陽湘南縣南郭又云今在廬江潛縣
西漢武帝以說衡山連曠因譏緯皆以霍山爲南嶽故
移其神於此其土俗人皆呼爲南嶽南嶽本自兩山爲
名非從近也如郭此言則南嶽衡山自有兩名一名衡
山一名霍山自魏武帝以來始徙南嶽之神於廬江霍
山耳華山爲西嶽郭注云在弘農華陰縣西南恒山爲
北嶽郭注云在常山上曲陽縣西北注正義曰嶽者何
嶽之爲言楠也楠功德也必先於此岱山者言萬物皆
相代於東方故歲二月東巡守至于岱宗宗者尊也岱
爲五嶽之首故爲尊也柴祭天告至者謂燔柴以祭上
天而告至其祭天之後乃望祀山川所祭之天則蒼帝
靈威仰同陰律也者鄭以先儒以同爲齊同此律故辨
之云同陰律也故大師云執同律以聽軍聲又與同注

云同陰律也不以陽律名管者因其先言耳所以先言者以同爲平聲平爲發語之本今古悉然故先言耳謂若逆昭穆者案文二年秋八月丁卯大事于大廟躋僖公逆祀也左傳曰夏父弗忌爲宗伯曰吾見新鬼大故鬼小先大後小順也於是躋僖公於閔公之上是逆昭穆也律法也者律法釋詁文法謂法度諸事皆是即大行人上公九命繅藉九寸冕服九章建常九旂之等是也假至也釋詁文也云祖下及禰皆一牛者謂從始祖下及於禰廟別皆一牛鄭以經云祖禰用特恐同用一牛必知每廟皆一牛者以尚書堯典云歸格于藝祖用特祖既用特明知各用特也唐虞及夏五廟則用五特也殷用六周用七也又尚書洛誥云文王騂牛一武王

騂牛一是各用一牛也自此以下皆是巡守之禮雖未太平得爲之故詩時邁巡守告祭柴望也時邁是武王詩邁行也時未太平而巡守也故大司馬云及師大合軍以行禁令以救無辜伐有罪鄭注云師所謂王巡守

若會同不言大者未有敵不尚武又注云大師王出征伐也以此故知未太平得巡守皇氏以爲未太平不巡守非也其封禪者必因巡守太平乃始爲之故中候準識哲云桓公欲封禪管仲曰昔聖王功成道洽符出乃封泰山今皆不至鳳凰不臻麒麟逃遁未可以封又禮器云升中於天鳳凰降龜龍假又鉤命決云刑罰藏頌聲作鳳凰至麒麟應封泰山禪梁甫管仲又云封禪者須壯里禾鄒上黍江淮之間三脊茅以爲藉乃得封禪是太平祥瑞總至乃得封禪也然武王之時未太平而時邁巡守之下注云天子巡行邦國至于方嶽之下而封禪也似武王得封禪者鄭因巡行連言封禪耳不得當時封禪也白虎通云封禪所以必於泰山何萬物之始交代之處必於其上何因高告高順其類也故升封者增高也下禪梁甫之基廣厚也天以高爲尊故增泰山之高以報天地以厚爲德附梁甫之基以報地刻石紀號者著已之功跡或曰封以金泥銀繩或曰石泥金

繩封之印璽孝經緯云封於泰山考績燔燎禪於梁甫
刻石紀號又管子云昔古封禪七十二家夷吾所識十
有二焉無懷氏封泰山伏羲神農少皞黃帝顓頊帝嚳
帝堯帝舜禹湯周成王皆封泰山惟禹禪會稽成王禪
社首爲異自外皆禪云云白虎通云三皇禪於繹繹之
山明已成功而去有德者居之繹繹者無窮之意五帝
禪於亭亭之山亭亭者制度審諦道德著明也三王禪
於梁甫之山梁者信也甫者輔也信輔天地之道而行
之所禪之山與管子不同者異人之說未知孰
是云云亭亭繹繹梁甫並泰山旁小山名也

禮記注疏卷十一

禮記注疏卷十一考證

王制天子之三公之田視公侯疏若虞號之君爵爲公
地方百里○臣召南按公侯百里周初定制虞號公
爵自應百里耳張逸問及康成答皆非也春秋時之
爵大地小與爵卑地大豈周初定制然哉

制農田百畝注疏按周禮地有九等故司徒上地家七
人○臣召南按司徒上脫小字又大司徒所云農夫

授田實有九等大字則小字之訛也均土地是小司

徒職文下所引不易一易再易云云則大司徒職文也

州二百一十國注設法一州封地云云疏謂假設爲法非實封也○臣召南按賴有此文理尚可解朱子曰

恐是儒者算法其實不然建國必因山川形勢無截然可方之理真通論哉

八州八伯疏鄭答志云○志字衍

又疏不可分爲四侯半云云○臣召南按左傳所謂

五侯九伯杜預以五等之侯九州之伯解之是也鄭
拘疑太過遂至支離

制三公一命卷注疏故尚書臯陶云○云字上脫謨字

又疏其三公司服無文云云○臣召南按周公三公

也詩曰我覲之子衮衣繡裳則衮冕矣但周公是九
命者其餘八命之三公自合鷩冕以此經文推之可
見疏據射人有執璧之文謂當與子男同服毳冕非
也天子之卿視侯況三公乎

五年一朝注疏殷則經籍不見故不言也○

臣召南按

商頌有來享來王歲事來辟之文何不引之

又疏則侯服朝者東方以秋南方以冬西方以春北

方以夏○

臣召南

按此刊本轉寫之誤也當云東方

以春南方以夏西方以秋北方以冬斯與鄭注明堂
位之意相合

至於南嶽疏自魏武帝以來始徙南嶽之神於廬江霍

山耳○

臣召南

按魏字誤徙衡之祀於霍自漢武帝

始也尚書疏作漢字是

禮記注疏卷十一考證

謹案第三頁前五行疏甲丙戊庚壬刊本庚訛寅
據毛本改

第四頁後六行疏注云刊本注訛佳今改

第五頁後一行疏殺梅伯而醢之刊本醢訛醢據
毛本改

第七頁前二行疏須便民利國刊本監本毛本便
訛使據宋本改

前五行疏周爵五等法五情諸本情訛精據宋本

改

第十一頁前六行疏小國上九當次國中九刊本

次訛大掾宋本改

第十二頁後一行注并四十六諸本六訛九掾宋

本改

第十三頁後三行疏以時入之于玉府是也刊本

玉訛王掾周禮改

第十八頁後一行疏前文云刊本文訛又今改

後六行疏魯欲伐邾刊本伐訛代今改

第二十頁前六行疏去王城三千五百里諸本城訛幾據宋本改

第二十一頁後五行鄭駁之云而諸侯多少而上疑有闕文

第二十三頁後四行疏太公為王官伯刊本王訛五今改

第二十七頁後二行注不得世諸本世訛位據宋

本改

第三十頁後三行疏周以黃目諸本目訛也據宋
本改

後四行疏故知虎雌虞夏已飾於尊諸本雌訛麋
據宋本改

第三十二頁後一行疏故知用朝服也諸本服訛
故據宋本改

後四行疏以幅廣二尺二寸刊本幅訛幅據毛本

改

第三十七頁前四行經亦弗故生也諸本亦訛示

據宋本改

第三十九頁後一行疏多與鄭義乖違刊本乖訛

乘今改

第四十一頁後一行疏而云三代異物乎刊本乎


訛平今改

第四十四頁後四行疏諸侯待于竟刊本待訛待

據毛本改

第四十五頁前五行疏宗廟是內神又宗廟可以
表明爵等刊本廟並訛朝據監本改

後六行疏嶽之為言桷也桷功德也諸本桷訛誦
據宋本改



覆校官編修臣項家達
校對官編修臣朱依魯
謄錄貢生臣江長鎰